

# FRIISK TISING

**Lasmootebles foon e Friisk Foriining – 2/2013**

www.friiske.de, telefoon: 04671-6024154, iimail: info@friiske.de

## **E kris Nordfraschlönj än sin manerhäide**

*Hüsem.* Fertreesere foon tweelwen manerhäideorganisasjoone hain for kortem e ge-läägenhäid än berucht am jare arbe än uk sörje bai e tweed manerhäide-önjhiiring önj e kris Nordfraschlönj. Kultur- än bildings-ütschus-formoon Gary Funck köö koleege foon e fraktsjoone foon SSW, CDU, SPD, WG-NF än FDP begröote. Bloot e Gräine kömen ai tu e önjhiiring. Uner da geeste wus uk e manerhäidebeapdråchd foon e ministerpräsident, Renate Schnack. Da organisatsjoone, wat beruchteden, wjarn e Frasche Rådj, et Nordfriisk Instituut, e Nordfrasche Feriin, Friisk Foriining än fort jarst tooch uk e Öömrang Ferian än e Rökefloose. Deertu köm et pläättjüsch tsentrum, fertreesere foon e dånsche organisasjoone än Matthäus Weiss än Holger Bruns foon e loonsferbånd foon e Sinti än Roma. Da fordreeginge foon e önjhiiring wårde pårt foon e manerhäideberucht foon e kris, än am e riseltoote än ünlike forsliike schal önj e kultur- än bildingsütschus widere snååked wårde.

## **Omrop Fryslân önj gefåår!**

*Ljouwert.* Geart Benedictus foon e weest-frasche „Ried fan de Fryske Beweging“ än Andries de Blauw foon e „Waane foon Omrop Fryslân“ hääwe süwat 12.000 unerschafte fort bewååren foon Omrop Fryslân ouerdänj tu e prowinsministerin Janne-wietske de Vries. Önj e petitsjoon ferlänge da biise organisatsjoone, dåt Omrop Fryslân ai mör as regjonaale siinjer behooneld wårt, ouers önjt meedierucht foon e Naaserlönje en apårtien staatus fäit. Bait ouerdouen wised Benedictus deeraw haane, dåt Omrop Fryslân di iinjsiste siinjer as, wat en hiilj program önj e tweede riksspråke ütstroot. E siinjer koon deeram ai masted wårde, wan hum e fryske språke läämti hүүлje wal. Ma e petitsjoon hoowe da biise organisatsjoone, dåt e prowinsregiiring ålet deet, am e siinjer tu hүүлjen. Önj Den Haag jeeft et ploone än spåår e regjonaale raadio- än fiirsii-siinjere in.

## **Frasch fiiljtuur eefter Oowentoft**

*Bräist.* Sü as arks iir wus uk jarling wi en floose foon fraschschoulere foont dånsh schölj önj Bräist unerweegens aw en tra deege lung fiiljtuur. Organisiird wörd e räis



foon e frasch liirerin Christiane Boden-hagen, än bai e tuur ma deerbai wjarn uk da biise önjstalde foon e Friisk Foriining. Sunt e 90er iirnge büt Christiane Boden-hagen e fiiljtuur wilt e dåk schöljt看id for da schoulere önj, wat friwali bai e fraschunerrucht ma-mååge. Sam san uk bai har önj e frasche musiikfloose ma deerbai. Jarling gäng e tuur mat fiilj foon Bräist eefter Oowentoft, weer e floose da talte aw Föögelhåli apstale muurst. Awt program stöo di läedere dái en fääring önjt Noldemuseum än en besäk önj Tuner. Ma deerbai, wan uk ai awt fiilj, wjarn jarling uk e dånche bjarnetüns-bjarne foon Bräist uner e liidjing foon Mette Jakobsen, wat ål da latjste önj kontakt ma e frasche språke brängt.

## **Thede Boysen klååget**

*Flansborj.* Thede Boysen, bit fergängen iir formoon foon e feriin Nordfriisk Instituut, heet bait ferwåltingsrucht önj Slaswik en klååge iinj e rundfunkgebüür inlångd. „Da naie rundfunkbaidreeginge hääwe we frasche jüst sü tu betåålen as üüs tjüsche näiberne, åldåt e mediaal grünfersörjing for üs frasche ai jült“, schriif Thede Boysen aw Facebook. „Niinj mediaal grünfersörjing, niinj iinjs lååsting, niinj iinjs betåålen. Iinjsen siinj, hü e tjüsche judikatiive e bregene pluralismus bai e NDR beurdiljt. Ik hoow, ai sü luum as e politiik“, sü Boysen widere.